

四庫全書

集部

欽定四庫全書

澗泉集卷六

宋 韓澂 撰

七言古詩

元默書來作溪翁亭成且索詩因寄四章

潛山之水兮流幽幽溪翁何在兮流不休昔之隱於此  
地兮將何求後世之人兮因築亭以遨遊

潛山之水兮聲潺潺溪翁何在兮聲可觀昔之隱於此  
地兮應甚安後世之人兮因名亭以考槃

潛山之水兮波渙渙溪翁何在今波可玩昔之隱於此  
地兮信無患後世之人兮因登亭以蕭散

潛山之水兮源遠遠溪翁何在今源不見昔之隱於此  
地兮自無怨後世之人兮因茲亭以繾綣

春風歌

歌春風柳條微綠杏花紅小園曲逕草茸茸蝴蝶高下  
飛遊蜂澗邊流水鳴琤琮斜日正在林影中遊人醉倒  
歡意融夢魂飛入東華宮

太白襄陽歌圖

謫仙非詩畫非畫山簡襄陽別有話空令江左作圖看  
竹院留藏我悲咤傳聞邊頭腥甲兵峴首依前漢水清  
隻輪不返邊塵掃莫負當年力士鎗

詠陶宏景詩

山中宰相陶隱居所注本草將何如更題真誥作神遇  
佳夢是實寧非虛人生形神為幹軀心欲造設氣乘除  
瞬息變幻爭奪途入山何難可躊躇玉波流煙照林廬

嵐影爽氣歸衣袂晏起早卧食息餘三景九道回八區  
一再傳其坐忘歟俛仰今昔多憂虞榮名中人天機淺  
言與不言養恬愉

昌甫題西洛遺民詩卷并所書杜句

東里感興西洛詩其年憂國初南來後人玩之可忘疲  
甚矣世變非吾衰長言短句筆墨古顛倒妙處誰能窺  
雨涼梅熟樽酒地舊人家藏欣見之其間亦錄杜陵老  
賤闊軸大何爾為要知真識未易見我乃徵遂於茲時

瀟湘莫結遺民悲，信誠空歎晏更癡。

書姜白石昔遊詩後

平生未踏洞庭野，亦不曾登南嶽峯。因君談舊遊，恍如  
常相從。江淮歷歷轉湘浦，裘馬意氣傳邊烽。吾嘗汎大  
江，祇見匡廬松。乘風醉卧帆影底，高浪直濺嵐光濃。日  
暮泊船時，是時方嚴冬。雪花壓船，船背重纜搖舵鼓聲  
如鐘。當年意淺語不到，無句可寫波濤春。君詩乃如許  
景物，不易供盡歸一毫端，狀出三飛龍。

其詩言山陽人見三龍

間勝處貴着眼雖有此興無由逢錢唐山水亦自好奈  
何薄宦難從容南高北高一千丈潮頭日夜鳴靈蹤應  
有隱者為識賞青鞵布韉扶杖筇君無詫彼我愧此急  
還詩卷心徒忪

陸丈劍南詩斯遠約各賦一首

鏡湖湖上涼風起楓葉蘆花照牕几筆牀茶竈連酒壺  
炯然目光動秋水平生北固與西江贏得蚍蜉事訾毀  
青城山菊散闕頭豈是甘心放豪侈歸來玉階僅方寸

兩路又出將使指幾回詔節去徘徊愠色何曾為三已  
桐廬瀟灑非小壘更向南宮擅詞美軒渠肯受塵鞅羈  
漢庭公卿未知已我間訪友於溪居三嘆共讀公之書  
清詩句句律有餘愛而不見今何如

趙將示及吳推官詩

玉溪蓮幕哦詩聲聲和水南松竹清眼中孰不有言句  
句到極則何能聽衡茅吹寒日惆悵倚樓公子猶相訪  
袖裏新篇乃若人春風翡翠蘭苔上



元夕夜坐觀黃庭經

虛簷湧月垂小窻屋外有山流澗江夜氣少定百念降  
膝席引手挑油缸靜取黃庭誦琅琅爐煙噴結栢子香  
上元仙官朝紫皇九闕洞開鳳鸞翔清輝影導胎禽雙  
前昂後低幡節幢塵間如帑正紛屐眇然駢羅萬家邦  
形軀已經幾星霜回思淡薄天人糧卻滅百邪致欣昌  
收聲藏神味差長

上饒出示仲至遺畫

我識睡翁尤更早翁今死矣我已老寥寥故家鄆東平  
麗澤淵源有深抱睡翁又號曰栗齋餘事書帖亦可懷  
摩挲展轉心眼開此道於人何有哉

張果老小刻

張果老驢兒開元天寶時三郎非仙才此老戲之如小  
兒異代想像空好奇莫解莫說且莫知

寫捕魚雪圖軸

前村後村雪糝糊漁家敗屋臨江湖綸收網結閉門坐

樹籬草岸炊煙孤波停水凍魚不食平者為沙高者石  
可惜都無一句吟筆幻生綃定誰識

馬圖云韓幹筆

韓幹畫肉不畫骨駿尾蕭騷倏超忽世間凡馬徒區區  
筆底丹青色尤勃風塵瀕洞心力短世代推遷辭氣訥  
鷹鷺相呼可奈何金粟堆前龍蕩窟

成趣園

徐子筆端妙天下成趣園成記如畫丹青寫就未必工

裝點鋪模誠可詫試問園中今幾春主人種花花正新  
高帝子孫氣象偉等閒卜築冰溪濱道南推託借誰住  
只為記中多好句幾回相與酒盃空梅月柳風吹杏雨  
淵明此趣非偶然請君醉中知其天我閑杖屨猶翩翩  
莫教俗事來眼前

二日陳主簿山園

芳尋梅山上春浦夾道繁花何用許晴風暮日藹微宇  
佳處留連因語語夫君易學誠可數盤折崛崕非媚嫵

叫閤歸來心獨苦酒飲我時無道古

松棚

去年一旱暵欲死猶幸春來能忍飢長夏因仍作涼計  
中庭始架青松枝門前催租急非緩國中遺詔安若危  
貧無輸官尚自可忠欲輸君今已遲風來蕭蕭悲益甚  
日遠茫茫愁不知誰謂身閒得放逸家國一體人弗思  
雲開空山久闕雨蟬噪古木還迎曦松枝松枝綠差差  
吾忍坐卧來樂斯

登曬簑臺

半村臺上看曬簑風日清美奈翁何山空無雲江不波  
老來漁釣間婆婆門前車馬誰經過取濁酒飲健句哦  
我雖不言興已多卻因此翁思老坡

題潘舍人小月巖

山石漠漠明寒煙望中一見心淒然平生玉斧修未圓  
幾年只在靈溪邊長安人家雜塵土驚怪轉庵能斷取  
知君詩眼留萬古不待四更看月吐

寒綠張堯臣以道之居

雪窗有第名寒綠墜緒旁搜善能續人間此味甘如飴  
采擷行吟應自足肯羨西湖多厦屋只為南湖生杞菊  
春風間煮折脚鐺不信從前祗蘇陸

伯臯索題真益齋語蓋以後山詩為名

彭城居士意甚遠彼自丹青金石苑平生心力漫收斂  
眼所到處聊排遣伯臯伯臯真有益此語令我長太息  
南渡草草今百年笑倒米家書畫船

銅官富覽亭

暮天不盡山明滅，文物從容兩竒絕。  
射江返照魚舸輕，隔岸人家炊煙發。  
依依柳色草青青，一曲風前韻清越。  
醉歸飛夢遶庭臯，樂處十年待君說。

山翁亭

東山高處山翁亭，羣峰巉絕環障屏。  
遠者紫翠近者青，天淡淡兮風泠泠。  
人間紛如凡骨腥，我欲飛仙跨雲駟。  
問翁何在遊帝庭，寒氣倏然驚酒醒。



走筆戲詠散庵

結庵名散將何為心散意散空自知等閒收拾到窗戶  
草木亦覺風披披浮世徒爾相拘束達人大觀歲月速  
有時散蕩吟一詩詩與此庵無盡期

題野翁亭

峯巒峰前野翁亭溪聲常在山常清我來尚想坡仙靈  
刁令遺事猶芳馨寒煙濃淡晚雨零主人醉客客未醒  
他時此地誰重經俛仰今昔俱忘形

招真嵒

蒼崖松聲風泠泠心高太虛望青冥幽尋王君集山靈  
古井方池誰招真金沙嶺頭淨無塵呼吸風光聚精神  
開合陰陽三尸驚逍遙吟哦黃庭經青蕊琳琅潛玄英  
扶搖三光駕雲駢羽衣翩躚上圖清我輩豈是區中人

草堂

杜陵枏樹草堂前至今物色歸吟邊玉溪清泚太霞仙  
我亦見之誰謂然書窗明明有公子坐對新詩發瓊蘂

春雲靄空風過耳為作區名識其美

楮亭山白雲寺

案詩二首其一  
見七言絕句

風霜高潔天意寒捫蘿石壁不作難躋攀古寺地陡寬  
中有定僧瑣玄關靜聽鳥聲人意閑六塵掃除法觀還  
薦地整履還下山世緣禪機無兩般

海南思南礮正花欲過趙閣亦倦

春遊花時海棠醉夾道排空轉佳麗燕支豐頰嬌未醒  
翡翠輕鬟愁欲墜牡丹風裏晚煙明薔薇露邊初日媚

山礪深靜自成家  
池閣幽閑誰近市  
是中人物多情致  
賸擬芳尋為出計  
路塵獨怯過城闌  
遠水孤舟那得至  
芳菲易歇興終闌  
識賞難同吟且寄  
蹊間桃李豈無言  
草木何知吾亦戲

魚莊午睡

魚莊借榻眠  
春風湖吹晚煙波  
拍空是中祇可飲  
醇酎  
摩挲醉眼花  
能紅兩峯高高浴  
鳧亂杜若汀前楊柳岸  
相逢君嬾我更閑  
不用長歌白石爛

歸舟過東流丘簿清足軒

倚船江頭看修竹誰家有軒號清足敲門應喜故人來  
一飯從容可無肉春風桃李徒紛紛獨抱勁節惟此君  
自公退食且嘯咏他日得時能拂雲

曉步

家在溪南山下住清曉西風生杖屨鄰翁相見笑相呼  
春雪滿甌香似霧屋頭種竹池養蓮林深古井多寒泉  
坐談不覺天已暮秋入斷霞孤鷺邊

曉起

煙雲未收天未明  
眼頭依依帶疎星  
行人道路貪起程  
戍樓鏖鏖殺五更  
青山漸出一溪綠  
溪面橫舟山有屋  
紅光扶日升  
暘谷且聽吾歌紫芝曲

北窗夜卧納涼

暮煙和角帶疎鐘  
修竹軒窗一枕風  
月淡天高雲弄影  
紗幮如水半曛中  
夜深便覺涼無暑  
庭戶惟聞草蟲語  
參橫斗轉已三更  
露氣襲人欲輕舉

同周兄南仲遊滄浪

滄浪之居蘇子美滄浪之水僅清泚闔廬城中今何年  
宛轉依稀無乃是石鑿鑿兮岸靡靡紫葍浮煙復雲委林  
空鳴禽時感耳我亦為渠聊步履千古萬古一長史非  
網打盡那得爾清風明月誰匪閑同遊之者子周子青  
春已深炫桃李寒食清明數日裏滄浪之水不可比滄  
浪之歌不可擬

滄浪後為章子厚家又為韓世忠斬王  
家水皆填而為園亭矣十餘三四耳

文叔折柬誇其夜宿湖心午登南屏石洞納涼

落殘明月照湖心  
小艇揚波荷氣深  
誰能一枕華胥夢  
占得其清無暑侵  
長飈撼石應真洞  
淨慈高絕南山陰  
齋盂茗椀復宴坐  
了義不必開禪林  
老身執熱困塵屋  
偈塞嘈雜蹠足音  
櫟庵受用乃如此  
斫額望之聊自吟

趙十同飲

君家兄弟非他人  
與爾同寓冰溪濱  
醉吟浪宕只這是  
天地混沌疑非真  
琢得一句兩句出  
未必魂魄無精神  
知我罪我春秋經  
王霸隆替俱埃塵



昨日過沈兄無隱

鑑

邂逅楊溥子

孟博

亦來溥子

攜酒就無隱飲余酒行頗虐病不勝焉席間先

逸作詩道謝意

落葉紛委山路榛飯餘試作捫腹行人家有竹不可欸  
負郭乃得席作門座中邂逅執戟孫攜尊更約重論文  
青橙紫蟹亦俱設愧謝子意因余勤諸公飲量江海吞  
我病忽苦頭岑岑不如淵明醉遣客乃效濯夫觴貴人  
懸知事急起排闥君更追路仍挽襟吾曹相從貴真率

如此可畏還可欽扶牀走筆道不敏祇恐匹馬來三軍  
入城晁尹二家少留

我扶敗輿過溪北城郭雖喧有書屋霜雲忽暗疑雪天  
坐穩瓶梅蠟香撲何許心情說餞歲漫寫詩吟驚易俗  
百年王謝幾人家目斷蒼茫聽爆竹

春浦門外看梅因飲宋氏小軒

春晴晚步春浦門小飲醉入梅花村繁香吹雪數十樹  
青山遠近疎籬園誰家水竹明窗軒老我清坐俱忘言

須臾煙月光吐吞歸哉樓角橫黃昏

山間南圃海棠花開

舍前舍後海棠紅碧軒宛宛連霞宮浮光弄景雖帶雨  
睡思醉貌空臨風雷輕霧暗時過前無處告訴杜老顛  
溪山深密春晝寂花撲一澗飛來泉

梅枝

今年未見梅花好竹外溪頭春自早滿瓶天嬌送香來  
照坐淋漓擠醉倒瓊林飛出蒼精龍朔雪未下風滿空

笑指蓬萊清淺水連雲  
瑣斷最高峯

謝昌甫茶且囑同往來諸友飲之

山翁包題抵書信  
盥掌剝封乃茶茗  
更看健句團筆陣  
得之足以忘食寢  
清風兩腋何敢辜  
常日諸人當聚飲  
陸子泉頭活火煎  
一啜須令各蘇醒

昌甫寄酒蛤辣螺新蟬皆山味所久無

蛤蜊因酒得天全  
踞無龜殼吾非仙  
六跪二螯猶回旋  
左手急持思拍船  
螺之辣者真海鮮  
每或酌侑能醒然

竹隱君其詩中權知我托落醉欲眠走送三物寸簡傳  
青燈山牖瓶梅邊食之既矣吟一篇比耶興耶今何年

昌甫寄栗

整整斜斜一書尺磊磊落落滿包栗霜風朝來吹我急  
且向葉爐煨煮喫高人知我老無力跼伏寒溪少出入  
慙勤題裹墨猶濕兩峯高哉翠雲滴

謝黃子耕惠紙被時在錢塘乍冷無衾窘甚

西江寒籐濯清水擣成楮衾起霜稜朱門鼎食笑弗顧

只有蕙帳眠山僧精綴不數氍毹厚潔淨未必綾錦能  
禦冬氣清神煜煜煖老體輕夢騰騰幽人玩之喜欲舞  
可與飲水同曲肱江夏無雙知此意又見寒來祇布被  
吳山客舍久窮愁帝城貴家誰顧視急呼大兒開篋箱  
取以贈吾真雅遺拂拭牀間時自思展轉枕邊誠有愧  
當如此衾堅且白身外輕肥皆棄置

尹子潛送巖

老來為腹不為目薄飯盤蔬亦云足成年準擬薇蕨甜

那計人間有梁肉二月三月春已深靈山土肥皆去尋  
長莖短束挂蘿檐出市不直三數金隨流揚波淨接洗  
芼以薑鹽付鐺耳生柴帶葉旋抽添糟蓴曠沈時染指  
晨光破甑炊浮浮稻香菜軟吾何憂人可以食鮮知味  
請聽以氣專致柔

送十瓜十梅易十竹於鄭一

十瓜十梅得十竹君應笑我喜可掬芳華春育豈凡同  
苦節冬藏惟勁獨取才要記自高臺著實能忘本深谷

寄謝悠悠莫驚嗤草木無情山澗綠

昌甫送松溪茶蓋云得之晁丈

章泉寄我松溪茶北苑雙井未足誇蓋以人勝茶亦勝  
况復二老文章家松溪主人未識面每鄉往之而咨嗟  
想見讀書坐清晝薰風兩鬢生霜華趙晁嫺睦久同志  
近知往詣情愈嘉慙慙包裹得此茗歸來奚忍自啜耶  
憐我於晁頗臭味一旦拜此忻無涯亟呼童奴取活水  
烹煎試起瓊玉花不但愛此瓊玉花茶因人勝無以加



人身

人身一飽百不憂行住坐卧本何求  
冷煖大冬與大夏  
盛衰三春及三秋  
蒼蒼雲山緩曳杖  
茫茫煙水輕拏舟  
喜怒哀樂在中節  
生兮若浮死若休

初九日夜坐

去冬十月已飛雪於潛滿縣層冰結  
空齋老樹號朔風  
客枕欲僵衾楮裂  
主人猶有酒澆愁  
旦起相呼相煖熱  
坐中劉郎氣最高  
抵掌歌詩雜言說  
流光不覺小至近

澗路推頽門半閉兩年心事夜如何  
牕撼山林聲又別  
牀頭兒啼衣尚單  
竈下婢苦柴未爇  
麤官寸祿闕既遠  
故舊尺書音更絕  
薄田畚米雨不來  
欲釀一杯無麴蘖  
蕭然數長短更惟恐  
寒氣吹燈滅  
明當一水瀉清冷  
會見四山高  
嵒嶮重陰定自六出花  
悵望同雲記捫舌

重午

鬢花臂絲盤艾虎  
佳人競云作重午  
菖蒲細縷來泛卮  
快意酒行何用數  
忽憶當年楚三閭  
他愁我樂意何如

不識好惡類如此世間俗物爭奈渠

五日

去年沙坑作重午城下今年着船鼓過溪公澗逢交遊  
挈榼留杯失賓主宣和曾帶御書符荆楚誰言長命縷  
老因唐律為沉吟山隱輕雷催晚雨

十二月十二日雪

欲雪既雪復未雪短衣數挽從百結橫溪過澗起輕冰  
舉首長歌時叫絕莽莽歲寒殘臘月梅花前村後村發

橋頭獨釣任漁翁  
千山萬徑不可滅

二十九日大雨

錢塘禱雨上天竺  
大士往來燒寶香  
支郡神祠亦照答  
自鳴山出氣蒼茫  
風投襟袖帶衣寬  
短髮重搔為整冠  
待得成霖三日後  
出門公澗看清湍

風雨

風雨如晦雞既鳴  
茅茨疎濕迷山楹  
披衣不知所如往  
爐存宿燭猶熒熒  
水流花謝青春深  
前村解橋隔孤城

庾郎鮭菜當用情瓶粟更付折腳鐺

十九日

吹鼓打笛農禱雨都道小禾遲者乾高邛之田已如此  
低窪晚稻難更看官司只怕放苗頭田里豈但餬口憂  
政在養民舜之政損下益上非所求

霜寒

沍寒日日霜如雪地土縮高磚石裂板橋積厚滑難乾  
林葉有同裝玉屑朝來負暄殊不暖過午欲晡冰更結

無風亦覺氣酸然只是水邊梅影別一冬既雷仍既雨  
僅可得晴霜未絕家貧無人去拾柴白屋何由生煖熱  
且擁敗絮莫出門欲賦江梅詩轉拙細思雨霜豈常霜  
須見陽和變時節待他春色到人間定自忘之都弗說

七日大雪浙江亭訪希之

江波沄沄山雪盛寒霧不收潮風勁詩人與我把一杯  
信道東南此為勝隔望遙知是剡中坐看飄洒歸空濛  
回首紛華車馬外西湖雖好此無雄

十五日夜月蝕聞差中舍正言監測清臺

慶元三年中元日是夜更餘驚月蝕須知穢巷亦喧呼  
見說清臺正推測昏昏已作赤朱紅閃閃猶成墨漆黑  
磨刀急斬蝦蟇精天眼光明無變色

月溪清汎

不奈江渾復林熱長夏逃虛徒散髮扁舟何許可追涼  
安得佳人弄明月尋常浪飲苦匆匆邂逅一遊多汨汨  
日復日矣心轉癡牽強而來終勃率琴堂有仙真好奇

簿書堆裏清興發我雖老倦亦軒然相與聽歌忘病暍  
中流滉漭已蒼茫下瀨回公應蕩渥山高影翻棲鵲巢  
潭澄光射鳴鼉窟須臾斗柄插銀潢常娥俯濯淩波襪  
快呼天風駕雲濤弱水三萬條超忽

和壁間林文節公韻

浴溪橋上山岑崑直下流波寒未涸只宜墨客寄幽閒  
不許行人動離索草木黃落已變衰晚風吹霜白雲歸  
清暉如斯耿獨立何處翩翩鷗鷺飛



和周次公

坐卧一榻殊執熱到手清言解煩結是誰所作疑彈丸  
定自不凡如玉潔昨夕之夕飲固多今日之日調則別  
山園空瑣楚臺風水路猶思剡溪雪須知野老本憂深  
何事騷人更愁絕題興倒載真世賢伯仁可與智者說  
二十一日同昌甫鎮頭和森桂時齋之句

齋樓之名散菴立時哉時哉貴翔集訓行處仁要領會  
德成勝非由所習眼高四海遠者遠知效一官急者急

工夫當思寸陰競淵源不可短綆汲

昌甫以詩謝履常見過因和韻

萬事新傳燈落燼底許深長并淺近山空歲暮風雪振  
縱得過從渾莫省符銅節蕩元整整東上西來晨復暝  
章泉之居儘虛靜世既相忘心孰競失喜故人來問訊  
且擁寒爐話吾勝留連雞黍夜初定清旦重言意無盡  
意無盡矣我何知歎者歎而哂者哂

王幹以詩寄和答

福唐荔子冬生花青榕深深多釋家海山會府亦繁富  
官自貨鹽常造茶民以不寃刑獄折無歲無人無一節  
同僚鬪牛應暖熱中酒過廳不可說

次韻徐斯遠曉梁看日出

曉山亂眼青如濕夜氣猶存煙四幕不知炎熱着何許  
但起陰風催日出含暉倒影殊蒼涼翻手塵埃復俱失  
高丘望女歌正長展轉歌之肯倉卒

次韻昌甫仲春讀謫仙詩

淵明太事多汲汲泥詩酒子雲良自苦載醪竟何有芭  
尊太玄八十一統集飲酒二十首我貴知我希卻掃且  
緘口

次韻

不須酒畔狂吟裏夢破寒亭自驚起一梢孤月帶霜華  
靈山漫澈氷溪水塵勞空度幾星霜畫手猶能眼界香  
午夜城頭吹畫角綠毛么鳳墮其旁不怕花前不我知  
只愁花後少人思如今紙上閒言語未抵依稀落墨時

趙履道同宿南礪梅大放次其韻

老身居山復入山  
隨山夾路溪彌漫  
南礪深處作幽夢  
我輩白鷗盟勿寒  
梅花乘春既宜飲  
綠毛么鳳非人寰  
坐中長少偶然集  
白雲清氣生簷間  
醉酣低摘仍高攀  
興來物會殊未闌  
悠悠不但惜此爾  
要留佳話他年看  
次韻希之

滄溟吐吞江水地  
風塵萬里一危亭  
自憐雪裏心眼在  
憑軒盡日空詩成  
波流不鳴雲不斷  
冷氣暗逼黃熒熒

銷凝還如未開鑿渾沌無際天難名相從共飲豈易適  
太息歲晚初何營尺椽已覺魚尾健數字更喜鴻翼輕  
吾儕天窮且天放酒肆人間誰長卿

次韻建倅德久林秘書寄貢餘

鐵獅峰前鳳山陽泉甘土肥靈草香丁蔡好事作土貢  
到今題畏歸朝綱密雲壽圭脫寶胯鎖鑰銀白羅帕黃  
春風玉食睿思殿歲歲屬望天一方恩沾臣鄰講讀處  
賜啜更覺昭回光龍鳳大團小團耳且如頭茶安得嘗

餘珍踵例及守漕屬幙亦得酬官忙平分風月石渠老  
分餉乃欲顛倒搜我腸

泂檄澗上將回呈元立

一夜西風入南澗便作秋聲無畔岸蕭蕭涼氣夢初回  
不奈離愁送遊宦人生義命當樂天倒睨鍾鼎初悠然  
明發分手莫惆悵他年看我棲林泉

次韻昌甫斯遠落花行

風力作狂無所止花片搖空當未已諦視深尋孰與比

梅葉梨梢孕青子春紅正復可憐爾三分前塵一分水  
相將桑桑著筐篚寒食北邙泣新鬼繁陰匝地人醉起  
哀江南兮臨結綺底用留情來賦此夏衣飄飄欲輕體  
斯遠作冷語甚佳以其富貴神仙中致非畸人

山澤所宜戲次韻東之

飛流作枕山作屏采薇散髮神氣寧巖扉無人晝長局  
幾回午夢驚獨醒水邊石上草自馨嵐光近散遠以凝  
長飈撼樹時靜聽灑然塵銷天籟清幽禽刷羽飛來輕



泉源舞荇聲泠泠殷雷收暑甘雨零碧落乍空鸛且鳴  
閑身無用心太平試琢新語朱絃聲世俗所為吾不應  
因君詩來如飲冰

次韻斯遠月夜

懷哉望望山園中月來老樹高玲瓏起行久之坐嘆息  
祇合輕舉隨飛龍露華滴葉相上下河影搖空更清亮  
長庚如晝夜何其寒氣襲人不可向

寄葉解元

醉中曾寫雪色壁非此主人無此客夜寒煙雨池閣深  
秉燭看梅忘墮幘春來相望鵝湖邊桃花滿地松拂天  
抱琴挾書過飄泉想君風度尤翩翩

贈劉解元

潮落潮生一水通崑山縣前桃花紅劉改之者忽相逢  
桃花正在煙雨中面須如戟頭已童君雖不言我亦窮  
一杯竟醉立下風江西人物舊所宗

溪路邂逅傳騏驥之在所沽酒話別

衆詩四首其  
三首見七絕

涼風吹溪雨吹蓬故人意氣俄相逢停驂為我一小飲  
西湖東望兩高峯人間萬事俱華髮雨歇風清有佳月  
不須千里苦相思得酒陶然已兀兀

送吳判官

儒家辰告當訃謨紛紛莫厭形勢塗甲兵調度應敵爾  
君行鄱水聊載驅有文與詩錦機織夾道雲山正堆積  
癡兒固有了官事歸日奚囊觀筆力別酒無用鯨吸川  
芝山杖藜湖接天使君自是江海客有來矍鑠當歡然

如今百事皆撐柱寬得一分猶復古蕭條野老為賡吟  
此話不同知底數

二十六日贈鄭一有懷趙十閩嶠之役

遊者未回居者藏老我去各天一方目前聚集自落拓  
背後往還誰論量連連冰雪葉已脫皎皎風霜梅更芳  
燭明照坐更漏長高溪里社靈山陽

戲東胡教授

去冬曾與十客遊今夏還約幾人至橋南花處數枝梅

青子林園尚堪醉行者居者復不來相賞相違何有哉  
古枯蒼山照流水我亦僅能知此爾

寄昌甫

深林蟬聲咽殘雨又爾微炎起亭午章泉幽流雨風寒  
安得從之臂不羽江南田薄多旱苦冥鴻孤高畏羅罟  
洪河東傾一砥柱雲霏霏兮澹承宇

懷昌甫

君頭短髮種種長營營寒事驚流光手翻手覆謂可常

幽意祇覺來無方  
今冬風雪多冰霜  
靜夜不寐猶吟螢  
竹隱我獨矯首望  
詩寄尚喜筆健彊

趙十生日作醮事

清飈吹塵玉溪煙  
龍舟未收菖蒲天  
城東寶香祈永年  
振振公子陳醮筵  
雨零霞外來羣仙  
德我壽我明自然  
宣簡流芳正綿延  
華裾織翠金丹圓

次韻耿運幹

青鞵黃帽非左計  
消得水涯與山顛  
吟邊憂世聽者哂

只宜尋醉陶陶然貴人責重閒人輕春風日高放脚眠  
帶湖拂波綠楊柳吾儕靜勝可忘年

聞民瞻久歸一詩寄之

我居溪南望城北最高園臺竹樹碧眼前帶湖歌舞空  
耳畔茶山陸子宅知君纔自天竺歸那得緇塵染客衣  
日攜研席過阿連怡神散髮思采薇

聞趙十有詩上饒生朝後兩日次韻寄之

文章精金真美玉交往徒勞分雅俗偶然邂逅一言詩

清秋付與陶潛菊弦歌之聲譽甚休田里民其無歎愁  
誰將茗酒壽弧矢長篇短句相唱酬是中佳處有深趣  
如龍翔雲豹起霧力探樂取到古人天地江山供指顧  
從他駒隙歲月馳我自舒徐蕭散之壚香莫著鼻觀淨  
喚醒伯牙鍾子期

昌甫有詩學長句次韻以東處晦且當應舉

章泉老子之詩學筆自崢嶸心自泊暮春靜把一杯看  
縱有世情無處著三傳且莫束高閣待子龍津名一躍



收回舊話再商量沈謝應劉都掃卻蠶葉人家採摘忙  
麥將秋矣水浮秧平田冷漠吹朝雨側徑深微過夕陽  
殘酒餘香愁夢枕斷篇遺簡苦吟囊鶯啼燕語春歸也  
不道高齋口自芳

斯遠訪昌甫同作音字詩因又一首

故人湖海誰知音章泉病翁卧山林我思不見夜長寂  
君往與同秋正陰修筠亂石一徑靜風雨滿窗清且深  
安得相從日上下騷雅共傾陶寫心

次韻吳推官二首

紫菊紅萸仍酒美，萬里秋雲接天水。  
登高能賦我何堪，會逢其適聊爾耳。  
蒼山小亭看奕碁，不有此客無此詩。  
古往今來吹破帽，河梁歸路月明知。

坡云今日我重九，自古騷人無此手。  
一從陶令歸去來，誰有間中能漉酒。  
籬邊采采黃花歌，不盈襟袖還幾多。  
滿城風雨固應爾，欲制頽齡如老何。  
怪來清氣侵毛髮，忽得新篇有風骨。  
溪亭應記見南山，玉水波寒步微月。

讀東溪可正平詩

冰霜落澗歲云暮寂寂遠岫松風回村深古寺作鐘磬  
車馬路斷樵者來參差一抹起宿雁清淺數枝橫小梅  
日昃翠寒雲屋迥竹爐煨火盡餘杯

陳君舉舍人集新刊三山因讀其詩有感

陳止齋詩不草草約貌前頭諸舊老大章短句可思議  
妙意餘情愁絕倒生薑門有水心道赤水亭占龍窟好  
伯牙無絃驥伏阜摹搨賸殘人或葆

吳判官野閣詩述先公甚勤次韻謝之

我登野閣思過庭  
吻角欲語徒悲鳴  
麗譙西池水木秀  
當年手種年年生  
五六十春幾交印  
幕畫英遊應接輒  
由來感舊誰發揮  
龍光斗牛知令問  
詩來喚醒醉夢中  
一日好事傳江東  
吳公治行天下美  
隱然蓋本西漢風  
大抵軒窗數間屋  
雅俗升沈堪躑躅  
光前絕後得名章  
便覺流芳爭誦讀  
夕陽淡月色朦朧  
想公退食書自工  
黃卷之間欠伸處  
催煎茶椀呼家童  
妙聲直啟重玄鑰

惠徽先君寧苟作其孤哀微但下拜猶向霜天辱杯酌  
錄王昌齡詩

千古萬古琉璃堂中有一人萬丈光長篇短篇任摸索  
小句大句宜忖量風花雪月初非遠城郭山林各是忙  
惆悵無因見范蠡空留佳話說南唐

題紫溪春晚圖畫

東風滿地吹瑤草水煖雙流山四抱參差樓觀倚晴空  
林靄乍收初日杲杏桃婀娜開花早蝶遶鶯遷魚在藻

人家籬落動耕桑溪女往來翁喚媪務頭臘酒賤仍好  
麥熟官清農晏保牢窰峰高多醉遊天目潭深無旱禱  
誰把丹青能一掃點綴毫芒殊可攷分明融蕩紫溪春  
路入煙霞是仙島

偶成

蠻歌俚耳吾不愁江南五月疑涼秋漸離荆卿易水流  
圖窮匕首非霸謀吳頭楚尾龍虎幽擊筑乃爾聽市謳  
調苦節促如遠遊安得酒船同拍浮袞袞切切終悠悠

雜賦二首

今年臘盡春風起，凌曉撐船度溪水。  
去年九日菊花開，相與周遊二三子。  
山深泉井一鄉村，地僻章丘數家市。  
酒飲詩成可奈何，坐想斯人消吝鄙。

贈天台鄭道士

霞杯為奏阮咸曲，悵望十年湖水煙。  
聞過東嘉看雁蕩，野雲留宿話條然。  
譚詩忽見蔣雲出，今去洞庭衡岳前。  
能說鍊師神不老，識全元是赤城仙。

欽定四庫全書

集部

澗泉集卷八

詳校官庶吉士臣吳烜

主事臣呂雲棟覆勘

謄錄監生臣李光緒

謄錄監生臣陳祁



欽定四庫全書

澗泉集卷七

宋 韓滉 撰

五言律詩

慈福太后生辰聖駕同中宮過北內上壽至曉  
鑾仗方回觀者無不仰贊慶禮四朝之尊也

案此

詩二首其一

一見七絕

盛典行長樂秋光溢壽樽后儀崇太妣帝服見曾孫遙  
想重闈集威推六殿恩歡聲開九秩誕節照乾坤

春日

院落無人到遊絲自短長  
細風添霽色斜日轉流光  
柳入鶯邊嫩花飛燕外香  
一杯春晝永試與問年芳

次韻元夕

煙月收微靄春歸柳色深  
落梅還滿眼啼鳥獨驚心  
醉熟醒何益愁多夢亦侵  
銀花元夜句猶記昔人吟

輦路元宵盛樓臺煙火深  
異鄉今日意樂事去年心  
溪澗斜陽下林空細雨侵  
扶輿且蕭散尋勝一閒吟

八日

去年苦無雪今雨又多風人日平頭過元宵轉眼中野  
梅香更白大杏色微紅籬落春陰外樓臺晚霧空

正月十一日

春前三日雪今則倏霜晴澗谷氷漸滿溪山風物清梅  
梢已飄灑蘭穗始敷榮宿約多神賽君來酒重傾

三月一日

海棠花上雪憔悴却如人曉覺春光淡時占天氣新燕

脂纔糝糝翡翠正勻勻睡足寒猶力宜多酒入唇

雨中上已

風作連宵雨山寒復晝冥  
餘醺花白白楊柳葉青青  
令節空輕過芳時惜易經  
清真王逸少修禊寫蘭亭

次韻昌甫寒食

南北已分壠後來那得知  
侵尋空歲月沉落漫歌詩  
宿草露殊濕白楊風更悲  
江村暗寒食老大故園思

十四日

淡淡春晴晚  
窻前燕子飛  
酒盃誰共飲  
詩筆自孤揮  
上冢家山遠  
下湖仙苑稀  
空多治遊者  
扶醉趕門歸  
風花郭店路  
靈井隔雲溪  
渡水魚爭出  
隨山鶯亂啼  
只疑身未老  
不信夢還迷  
今日逢寒食  
西湖春草萋

二十五日

山徑瀕溪轉  
林亭亞谷斜  
老詩無住著  
健酒有須賒  
急雨催楊柳  
微陰養杏花  
重簾新燕子  
隨處覓生涯

晚春

細雨收微暖輕雲起薄陰舟橫蓮葉淺人度柳花深佛  
屋多支徑旂亭亦遠林一春思放浪盡日喜登臨

初七日

晚來臺上坐猶自說春歸可惜園林裏都無花片飛榜  
人勞載酒鷗鳥定忘機笑摘青梅子傳杯看雨肥

七月

水石雲山裏歸來已九秋隔城如淺近鄰寺始深幽慧  
遠逢修靜文淵說少游徑荒殊不掃風葉上牽牛

九日

客裏逢重九路經鵝嶺頭物華元自好意緒不禁愁霜  
重曉猶積烟低寒不收營營本何事吹笛下滄洲

趙運幹秩滿經由寄懷任舍人直院九日

李月黃花酒今還過玉溪野僧談衆妙林叟祇孤睽  
滕閣有前境胥山無別蹊會須直學士霄漢記間栖

十一月晦

沙鴈徒高下荒雞任喔咿連山雲日過來澗雪霜吹葉

逕濕仍滑柴扉久易欹不知詩在否詩亦費心思

十二月旦

雪後寒簷滴青燈夜看詩人情雖已甚物色又何其永  
永孤城漏垂垂老境時瑠璃剪木葉今歲是冰枝

歲晚

歲晚家何在冰溪懷玉山雪梅香汎汎霜樹色斑斑村  
酒相招喚田歌自往還白頭搔更懶今識市朝間

十六日



不恨常踈隔何疑欠討論同心惟設飮盡興亦空罇日  
與樵爭席時看子候門山場風莽廣溪港雨沉昏  
寒水浮沙急昏煙擁樹深茅茨得幽隱藜杖失荒尋地  
暖疎梅發籬虛敗葉侵終風驚達夜未雪苦多陰

窓日

飯已南牕暖依違睡思生息虛神即固氣定體殊輕霜  
熟日初上簷疎紙透明欠伸詢早暮一唱午雞聲

乍暖

乍暖人多困，晝長春已深。  
殘花紅糝糝，新葉綠陰陰。  
山寺依巖曲，湖船過水心。  
釣簾醒午睡，閒覺去來吟。

晚晴

雨閣雲難斂，高樓忽晚晴。  
地卑雖帶潤，天近自增明。  
蚊動初成勢，鴉翻過宿聲。  
牆根有孤樹，清坐見涼生。

乍冷洒然

不可更禁當伏陰，多夏涼體中時作惡。  
鼻觀日焚香，照眼驚雙鬢。  
支頤待一觴，詩來相勞苦。  
邊事敢籌量。

初十日

沉沉三日雨衮衮四山風  
潢潦從浮汎羣陰漫長雄  
深居何藉屐矮屋且遮蓬  
急歛身心住徐看鼻息通

二十一日

向來愁見客今去莫吟詩  
自是才情減何勞朋舊為  
一身元屬我百事總因誰  
溪路多鰕菜呼童問早炊

曉冷

曉霧知猶冷初陽覺更和  
午風吹不斷夜氣暑還多  
簾

檻翻黃蝶燈牕撲白蛾  
晚春初夏際蠶麥復如何

風落

風落搖牕牖煙垂暗屋簷  
漫空時袞袞灑迥復纖纖  
着柳真堪折迷花自可粘  
春前一尺雪農事不須占

明月

明月度牕櫺荷香逼酒醒  
水聲鳴澗壑風影散林垌  
暑雨收微眇晴雲動杳冥  
小軒清坐久高下數飛螢

夜月

月近中秋好人寧不用情那知雲欲暮遽作雨連明圓  
缺間皆見陰晴老自驚夜涼山葉響燈火短長檠

聞雨涼意可掬

秋聲連夜起雨過雨來時睡覺風生屋涼知水到池交  
游稀自好出入懶方宜只被章泉誤書題又寄詩

雨多極涼冷

焉知三伏雨已作九秋風木葉涼應脫禾苗潤必豐地  
偏山吐月橋斷水浮空雞犬鄰家外魚蝦小市中

晚雨可愛

燈火涼秋夜空山雨到簷吹聲初甚少落勢近頻添  
籬菊叢叢潤畦蔬種種霑沈思仍靜聽香鼎伴書籤

初三日急雨湖山雲氣初霽樓居佳甚

雨後見雲山家林恨未還人生何自苦身老定誰閒  
溶洩平輪處縱橫羅列間幽幽清潤氣樓迥自怡顏

夜坐聞雨

夜靜時聞雨山深遠聽更疎林聲轉永孤戍景何清  
方

冊舒還卷殘缸暗復明脫巾搔首坐曳履欠身行

又

寒夜空山雨聲從遠樹來老懷渾木塞癡坐只灰堆抖擻閒題句團欒試把杯崢嶸歲云暮春在臘前梅

雨處

雨處茫茫白晴邊隱隱青林間田舍屋水際酒家亭野迥驚初見村深惜未經陰沉思得月歷落喜瞻星

煙雨

汀洲生玉水煙雨對靈山翠碧迷千嶂清冷瀉一灣尋  
春因共載落日不知還便是名人盡無能寓此閒

煖雨

土煖鳴蜺山昏聚宿鴉  
汭流多佛屋隔縣少詩家  
怕醉休溫酒狂吟待飲茶  
花天晴自喜麥地雨誰家

雨中

幽林遠朝市太息古來今  
四月麥秋後江南梅雨臨  
庭前三徑在路口一溪深  
車馬有時到定多閒淡心



花浥垂垂細林搖點點稀綠繁枝困裊紅淡藥鮮肥高  
下海棠起淺深山柳圍雲梳煙未止風急雨爭飛  
雨葉淒淒晚風花肅肅春乍看渾入意久坐恐傷神城  
郭三家市山林一病身幽偏無客到疎嬾寄吾真

雨後

魚沼成吹沫蛛簷落斷絲盆花半開合堦草盡離披風  
靜涼猶在雲低曉更遲懶能尋枕簟好去把鉏犁

二十二日雨

整衾和枕簟振席見燈檠欲讀書休讀難成夢也成四  
山連屋靜一葉隔牕鳴總不關吾事無非是物情  
澗水應添潤山雲定不虛夜光離復合朝氣慘而舒履  
畝禾須穫窺園菜可鉏稀疏遍籬落微密上堦除

四月二十三日渴雨

霧下疑成雨簷低暗復明田家思一稔王國慮多晴天  
豈預人事世應容我耕憑軒歸計定只得待雷聲

丁寺丞靈山閣同國正小集是日得雨次韻仁

甫五字

野寺乘涼雨宜從志喜論橋分一水隔城列萬家屯樂  
寓東山妓賢歸北海樽年登農滿望客醉我忘言

五六日大雨

海角地蒸雨江南天要梅晚春知望久中夏得愁開鬱  
鬱陰陰過綿綿浩浩來已傳增米價只道損苗栽

夏雨

轉輸三伏雨探借九秋風沾灑蓮猶碧飄搖葉未紅荒

涼甘退縮清潤擬從容在野農人喜仍年禾黍豐

東流值雨

客恨何時了蕭蕭雨未晴異鄉無伴處荒縣少人行樹  
色巡簷碧江聲遶枕清且憑間景物陶寫小詩成

雪後微雨

烟重雨尤寒風銷日未乾江湖浮綠淨巖岫列青攢嬾  
出空穿履宜歸且釣竿淒涼雨都舊洛下卧袁安

苦雨

開歲晴非少，經旬雨是多。  
澗寒人跡斷，山暖鳥聲和。  
試手應如畫，回身易擲梭。  
無聊宜已矣，有興竟云何。

五月八日喜雨

洒洒如人意，明明助歲功。  
夜闌愁有月，曉起喜無風。  
坡老記為美，宣王詩最工。  
朝家一祈禱，田里得和豐。

十一日同處晦蒼筤喜雨

清坐看涼雨，山林靜有聲。  
交遊因共話，衰老欲何營。  
風急初疑斂，雲低又苦傾。  
爽然神觀定，籬逕不知塵。

涼雨

默坐看涼雨山林有正聲冥濛元廣大點滴半虛明雲  
葉才羣起風枝又一傾信知塵易遣徒亂雅難平

陂池浮月影橋閣湧風聲遠雨收還施行雲翳忽明襟  
期看我醉譚笑待君傾涼夜玉溪曲行歌詠太平

雨涼

暑雨常憂缺秋霖莫厭多夜雷聲復厲朝霧氣方和積  
潤花出桂橫沉穗畝禾酒閒吟解穢茶熟困驅魔

雪

山外黃雲晚溪頭白雪深不知嵐氣重但覺水痕侵老  
眼轉愁坐孤懷聊醉吟樵聲隨遠近釣影任浮沉

雪後霜結未釋

苦雨翻明雪酸風結暗霜晚煙留積冷曉日度微陽茶  
竈薪難拾詩箋筆易僵龕官對窮臘何事不謀長

春雪再作凍甚

春雪不可賞草樹方萌芽從渠滅萬徑徒自負千花兀

坐地爐側困眠山枕斜  
渾忘瓶粟盡吟復厭浮誇

雪後如春

雪消春意動樓外已東風  
蘭珮新輸綠梅瓶久薦紅人  
生雖向老歲事豈終窮  
青瑣黃扉地西湖一望中

對雪

有霧光殊慘無風勢轉豪  
形歌天已近氣積地還高  
上下何其別周迴任所遭  
虛緣詩悄悄幻滅酒陶陶

雪望



山黯荒荒霧溪凝惻惻風乍明收髮髯欲暮起矇矓岸  
窄叢梅發樓高老樹空歸來煖杯酒爐火夜深紅

風雪見山林佳絕

煙濃山漸白風急樹還青鶻落飛鳶逕鷗浮宿鴈汀周  
遮迷疊嶂疾瀉快中冷敝褐輿籃几村醪飲易醒

雨雪

雨雪春將半山寒澗溢時誰題五字句我得一篇詩淡  
泊情何遠綢繆味愈遲間中且陶寫治國有安危

雪天

寒色搖牕紙瓶梅靜吐香  
小樓深坐穩矮屋欠伸長  
雪意垂垂白雲容淡淡黃  
西湖林處士侑食水仙王

春分後一日雪

尚覺梅花發元知柳絮飛  
舞迴風蕩激灑急雨霏微  
解凍羣芳盛餘寒百卉稀  
小牕還附火買酒典春衣

初八日雪

江國春來淺新年雪未闌  
雨霏初急急霰集復漫漫  
固

喜成三白寧憂已十寒微吟牕色晚清聽落聲乾

連日大雪

年後猶仍臘時閒即便春飛花殊惱我惹絮却隨人天  
地多奇觀江湖獨老身瓦溝填已遍彈壓萬紅塵

雪作

臘裏春前雪江南瘴癘清隔林應得趣一壑豈忘情已  
喜疎梅發遙知細麥生易疎何易密積厚轉無聲

開明三景淨幻化十方清此日扁舟景古人高卧情不

知朝氣重但覺夜寒生漫漫疑無色綿綿如有聲

東山

指點東山路松林一望中芙蓉爭弄日楊柳半凋風我到吟何比人間興偶同只宜携妓飲名宦付諸公

黃巡檢攝官八房場聞西巖有龍湫光怪

秋好西巖勝閒身惜未遊桂花香亂石楓葉暗長流蠟屐輸君適錦囊牽我愁定知風雨夕龍電震深湫

鷺鷥林

一段寒煙上雲行斷復低明中山映樹暗處水平溪村  
落籬門短人家草屋齊風回聽幽絕鳴午有荒鷄

坎石渡

春風送春雨細細濕輿籃過水航寒淥橫山觸曉嵐草  
芽時簇簇梅片未氍氍問友於何處田礪坎石南

灘頭

溪頭灘背狹高下兩三家風葉山街日煙莎路濕沙傍  
船初落鴈隔屋已棲鴉何處吹崖蜜滿園蕎麥花

月巖

本意遊雲洞因行過月巖西風低細竹初日上長杉塵  
外多僊隱人間易謗讒逍遙且黃帽憔悴付青衫

桐影澗流

籬落梧桐月情人語夜深露華垂近葉煙翳失前林茶  
果隨宜設琴尊不用尋山虛鳴絡緯幽澗亦流音

禪月臺

渺渺涼風起木犀相次開舉家空自住過客有誰來已

是水溪棹更尋禪月臺鬱乎湖海氣鷗鳥莫驚猜

又

僧清知野逸禪月有高臺自是登山去誰非入寺來孤  
花明密葉落絮起荒苔香篆茶甌久昏鐘我未回

桃花臺

紫詩二首其一  
見七言律

聳壑連天碧危臺照水紅何年仙子宅今日梵王宮勾  
漏人雖遠凌雲話亦空徘徊羨真隱吟寫分詩窮

趙推官求久齋詩項平甫有句

萬好庵中主今誰記此人久齋詩固在晏叟意尤新已  
逸決科步要持為學身尚賢而尚德餘事了通津

次韻斯遠過風月齋

老去親朋少相過夜達晨百年俱逆旅千載欠閒人經  
隔情雖舊綢繆意轉新板橋籬竹淨不着世紅塵  
地偏心愈遠彼自物爭妍屋宇山圍匝池塘水接連持  
醪留野飯推食有溪鮮風月齋曾宿施村阿那邊

趙主簿闕書室因喜三世兩中科舉



喜開書窓好高垂鴈塔名孫謀端有自祖業信能宏山  
木鬱爭秀簷花香最清太霞仙袂遠老眼為雙明

### 山林堂

山林堂揔好六十有餘年轉變人常爾興亡事亦然僧  
廬雖一坐道院尚相連彈指三家佳蒼茫起白煙

山林君已得邱壑我猶居地在名徒換年深景自如舍  
人詩可玩丞相事堪書領畧無輕負交遊本未疎

### 芙蓉堂和嚴丈韻

綠遍小池頭胡牀一日幽乍晴人意愜欲暮鳥聲流只  
道耽閒趣那知接勝游紅塵飛不到城府亦山丘

西山嶽祠

西山橋外路傍水去穿林石柱岩堯起溪流宛轉深清  
音成小立爽氣入孤斟晝靄叢祠處歸塗月已侵

淨居院

薄晚經禪悅深更宿淨居急灘鳴斷岸絕磴下荒墟茗  
椀僧同把詩篇我謾書快歟聞梵唄解榻見鐘魚

花庵次君實韻

居山仍在澗生事本無多老圃初收芋窮檐待補蘿逃  
虛惟獨往入俗也相過語默行藏外衰榮奈汝何

崇福庵

蓊鬱千山曲周遊一徑斜老身多歲月閑地少風沙度  
客來尤迥憑高望更賒小庵含法界不待野僧茶

白蓮庵分韻

好客不常遭登臨眼自高湖山起煙霧江海暗風濤酒

美情尤暢詩清氣本豪相從真可樂左手記持螯

大明寺

小泊大明寺傷懷復歎誰黃花風未折赤葉露空垂已  
往更何說相望只有詩城南人亦客數日夢行期

尹山寺

風淨綠陰合山明清晝長鉢單浮野潤龕座閔幽香鳥  
嘒集初夏鶴飛迎夕陽離人何用飲有客又成章

朱卿約余倅澗上招昌甫次韵昌甫

春雨得晴明山扉澗道清朋來何以報雅集偶然成柳  
暗枝枝重花疎片片輕經年不相見好事滿壺傾

市遠

市遠塵埃少村虛煙雨多極知九日近無奈一秋何掃  
徑尋僧話關門待友過巖香送籬艷儘可伴婆娑

稻田

秋深耕稼熟綠浪起黃雲縱却牛羊踐難驅鵝鴨羣斷  
乾根易撥催壓穗頻分烟露未全冷村村晴氣曛

颶糠

颶糠新出米打穀旋推禾健婦行茶枕癡兒守飯籬一  
秋能飽未終歲得閒麼農事無終極人生可奈何

種樹

種樹擁牆隙伐茅開地偏老衰常問祿貧窘失求田晴  
熱山前日陰涼澗底泉賢哉陶五柳只愛北牕眠

和韻紫芝留句寄之

一柱觀能好臞仙須討尋從渠有丘壑何處沒山林乍

惜靈舒試或矜莊可吟颯然秋氣冷清夢水之心

蘇堤芙蓉

案此詩二首  
其一見五古

爛漫芙蓉發霜前城北花因君話書室使我出山家風  
雨三杯後烟雲一望賒石丁餘興在相與醉生涯

觀柳見桃

柳已看看暖桃仍恰恰開葉間驚甚雨花外合輕雷不  
分青春半其如素髮催官間惟可句心醉也尋杯

竹外荷花

雨竹翻山翠，風荷漾水香。我行三步遠，人飲一杯長。不以扶頭去，其如掃迹藏。柳花纔露白，梅子又傳黃。

次韻昌父梅花

山水孤根畔，行吟不盡情。花為天下白，人比聖之清。冬日真無對，春風合主盟。可憐香浩蕩，歲歲落還生。

梅

霜風小搖落，梅已到南枝。要識人間事，須從物理推。虛緣看影動，昭徹待香吹。此後唯愁酒，從來未欠詩。



野趣軒見梅花

相逢暗香底又見一年梅枝既爾許瘦花猶如此開橋  
橫紅葉逕山晚白雲堆凍雨時吹灑人間寒事催

梅逕

掃葉去宿草園空起碧苔晚烟收未了初日又還來老  
樹幸無恙新花應有開年年到寒月全望數枝梅

西軒

聞道西軒整登臨識自今溪山雖郭外樓殿接池陰舊

觀趙岐發新詩尹喜深水南如此勝吾老復關心

題水鵲

水鵲衝衝過山鴉撲撲飛澗深應得趣樹密自能歸古  
路人行少家寒客到稀世途多輻軻隣里且相依

山鳥

春晚雨時晴隔簷山鳥鳴留連因共話拓落又閒行不  
選呢喃語從教格磔聲酒來誰可飲吾亦小詩成

鴈度

鴈度南樓雪寒聲裂紙腮身雖回五嶺影亦落千江抱  
膝吟諸葛全家隱老龐冥冥避矰繳一往信難雙

高鴈

高鴈承雲薄參差去復齊水村連落岸山寺迫浮溪風  
定轉宜遠日斜元未棲一聲歸兩眼不負拄枯藜



欽定四庫全書

澗泉集卷八

宋 韓澆 撰

五言律詩

仲至看杜詩分古語妙語老語甚精微

刺骨分三語剗心就一編古來雖簡短妙處實綿延飛  
動徐陳外淋漓劉柳邊泉溪有底急老乃更精研

和張祐孤山寺詩

嵐光湧翠岑寺影照波心風月明春曉雲霞起夕陰雨

山幽草合中道綠楊深誰與尋詩句空懷處士林

綠筠軒觀坡翁詩刻

野寺餘詩石誰移榜縣齋間來得尋句小立為興懷人  
俗真難療言高不可埋窓前有疎竹大嚼對吾儕

讀魏仲先處士詩有感偶成二首

顧影自婆娑食貧如我何不嫌知己少常畏識人多過  
澗耿獨立看山行自歌衡茅濕餘雪風葉亂煙波

澗泉韓仲止生計聊復爾無錢向誰嗟有酒徒自喜盡

日覽形容流年驚髮齒夜夜猶早眠寒來更慵起

晁家觀葉少蘊朱希真詩帖尹家諸賢書尺

摩挲石林帖太息巖壑詩竹院茶話久方齋酒行遲南  
遊耆舊盡北客子孫知聚集麥秋日飄流槐夏時

昌甫以平生詩藁俾趙家淨錄因見題後

藁不隨時廢詩須以藁傳老身猶在澗舊話只章泉籜  
笋看成竹藕荷將出蓮居然閒摸索久矣奉周旋

閒居圖

閒居本在我山林皆畫圖百世有新舊一朝非卷舒薰  
風入窻牖晚雨過庭除小醉同杯者幽偏得自如

夔一翁靈溪古松

邂逅靈溪水東風二月辰其誰留象駕為我出龍鱗等  
是人間幻聊分物外真知心莫彈指笑殺箇中人

金焦二山雪望圖

京口酒可飲江山開畫圖幻成清落索要識雪模糊不  
用袁安臥只消漁父居幾回煙浪遠落木墮寒蘆



題江南

邂逅江南景蕭蕭小桂叢不知春已過常得晚能同冉  
冉塵寰偏勞勞色界空飛潛與幽顯同是一樊籠

次韻胡教授送行詩

小作高溪泛灘光又滿眸新春纔兩日殘歲忽扁舟契  
濶思良覲吟哦合共遊掀蓬聞送句一片雨初收

上饒送番江酒次韻謝之

薦福湖邊酒能來為一中僚庵知祖道鄱郡見家風治

縣聊綏撫詩壇更長雄名章敢疇唱雨後夕陽紅

送黃寺丞商伯浙倉罷歸南康

邂逅登臨勝從容杯酒閒脫身方甫里滿眼已廬山此  
道天能會端人世所慳丹心空磊磊綠鬢只斑斑  
問學無窮事功名有定期古今誠可見治否老尤知袖  
手尋幽隱存心付嶮巖一時還別去何日更追隨

八月四日仁甫行

投老不堪別莫云師友情當時建陽聚何日上饒行舊

事消除盡新愁積漸生酒杯無浪與醉醒是秋聲

施教授考校他州

陶冶于文舉才賢定靡遺三年欽掌教一旦慶衡持過  
慮同官雜焉知監試誰無為我先達不念士人時

鄭一浙運使

好在春秋學宜乘筆力初邦畿緣伯討王道付儒書超  
乘亦人爾焚舟其我歟兩年嘉尚意東上赴傳臚

黃靖州子孫江西漕試

淬礪酬先志家傳合奏功子孫當決勝詞賦況同風南  
浦聯名處西江一戰中鄉閭飛榜到丹桂滿芳叢

送趙五哥秋試

才俊毋輕敵精神急護持寓鄉能取友官路必修為  
監秋高日禮闈春盛時龍蛇飛健步好好對丹墀

送葉卿湖南轉運判官

野路荷花發薰風使者車老懷諳萬事雅俗問三閭  
麓只如此湘江應可居時平間護漕歷覽且舒徐

自恨登門久飄零歲月深近知無復舊後定不如今聲  
迹嗟貧病形容入醉吟經行纔頃刻何日奉書琴

送顧丞汾檄徽饒

柳暗煙霏綠花殘雨潤紅夢思今夜遠別恨一枝同杖  
舄經行處江山興寄中紛紛鶯蝶鬧得意正東風

送顧丞赴張軍師辟書

細雨春帆外江波漫漫流人情雖忍別風景可言愁時  
命豈大繆功名寧罷休倚天長劍在談笑即公侯

送俞司戶

喜見魁鄉士薰風唱第歸  
豈惟榮里社亦足慶庭闈  
仕路當亨奮儒家要發揮  
一杯餞行色靈鷲想煙霏

送施仲益何文蔚余子任及蔣吳二友赴省

會適章丘役寒梅滿路生  
逢花百餘韻顧我不勝情  
祖送尋言句相期豈利營  
南宮三數子能賦復經明

送履常中州買漁艇歸半溪二三友放溜來迎

送客中州外乘流只自看  
日斜孤棹晚月上一溪  
寒離

合原非易行藏似不難歸來理幽伴莫負酒盃寬

送槩恭回貴池

乃祖朱轡地銅章又若翁江山應似舊郡邑本來同浙  
右還圍棘湖邊又艤蓬思常游宦處為子送秋風

十五日玉山道中見文蔚買酒送之

雪嶺吹寒霧行田過遠村班荆得佳士促席置清尊官  
業從茲始離懷不用論洋洋晁董對指日上金門

錢塘送元立

鳳闕追隨外龍山判別中怒濤翻夕照遠樹起秋風我  
亦情何限君應興與同舉杯凌浩渺挂席看空濛

別德久丈

四海轉庵老清詩晚更傳幾回看點筆頃刻誦成篇顧  
我直瞠若別公還惘然放懷琴酒地不覺已三年

別陳平甫

清暑蓮堂上何心詠別詩敢云歸計早常恨結交遲林  
館主人勝江山客子宜相看在霄漢折取桂高枝



別鄭盱眙

谷口從遊久流光恰六年湖山常盡日樽酒或談天世  
豈無他士公應自昔賢有閒應念我歸去白雲邊

別希之

雪裏江亭醉何時復賦詩豈無閒地飲那有主人奇忍  
別君言論徒勞我夢思尺書頻寄取莫負此襟期

子功過別

細酌林亭久風煙起近鐘蒼蒼雖暮色淅淅是秋容老

眼渾相對幽懷不易逢人生幾兩屐小榼尚能供

客樓南牕晴日中與坐客論別

樓館南牕暖追隨欲別時青衫空自老白髮未相知  
研墨因成事爐煙靜入詩家山有泉澗休問我歸遲

寄章泉

苔竹軒前笋薰風已布陰清詩誰可和白酒自成斟  
顧我塵埃迹思君泉石心一貧驅就祿不覺二毛侵

寄斯遠

不識後田路林廬近石阿卜居誰晤語屏跡自婆娑木  
落靈山出風涼玉水波明年當共醉盡日為長哦

寄周景瑜

春山風物美秋半復如何巖桂香仍發芙蓉花更多績  
文應委曲獵德且婆娑間僻離羣久新涼入短歌

寄章丘

揚雄一區宅今乃在章丘老樹葉叢茂小溪灘亂流雞  
豚為歲計穀米望秋收曉暮襟懷裏攜琴得句不

寄楊伯升

赴虛雞犬雜清有草玄家支逕開山背長橋過水涯歲  
寒梅弄藥春到柳舒芽城裏歸時晚年華與物華

寄亨中

冬至後踰月風霜欠雪霏團源新市井高隱舊書幃新  
水誰為給山園自不歸歲前春事動佚老是忘機

鞏仲至和張少卿韻約同寄一首

歎息南湖老詩禪只自深雨花歸宴坐風葉對孤斟城

郭舟車會齋房翰墨林遙知定中起吟嘯也如瘖

次韻王教授同寄昌甫器遠無為臨漳

長哦招隱句待月坐黃曛望望前村雨行行別渚雲敢  
期千里共常恨一橋分鬢影吹涼處樓高孰與論  
月到章泉白冥濛入杳茫四邊山影亂一路水聲長促  
織吟方動流螢起復藏夢思飛羽翼已墮晏齋傍  
清時朝蹟後休道不知津城市誰多客山林自少人儘  
常開老眼應甚惜閒身愛月聞吳詠無嫌更薦紳

濡須誰築塢玉兔正迷離兩歲能為守五言應報詩息  
峯延月夜稔稻得秋時湖海驚零落無癡了事兒

甌閩何處是絕嶺更危谿乘障消蠻虺望洋蒐水犀庾  
公情不淺朱老世思齊乘月胡牀坐角巾隨意低

昌甫回自大明見過別後二詩寄之

裋遺大明巢編因徐照題騷吟歸是正香味得非迷鄰  
邑十方轉到城還重攜新霜林路滑山遠羨高樓

早鶯翁歸去牕寒自撥灰算程明日到失記去年來雨

葉頻仍墮雪梅相次開  
吾生亦華髮易怕惹塵埃

寄鄭一

禪月臺高冷溪虛城背  
山人烟知井絡鳥雀見  
灣濼竹裏繁霜後梅邊  
欲雪間讀書有幽子歲  
晚更怡顏

寄履道

宰上廬深迥將書定苦  
心夜聲寒栢慘晴色古  
苔侵徑側牛羊履山空  
鴈驚臨明燈撥殘火幽  
夢理寒衾

寄尹一

尋丈方齋地移居城市東燈牕唯刻苦編集入磨礪北  
客家能爾南遊事不同常思文獻大祖道古人風

寄王二萬頃

一曲清江上君能靜結廬年豐時釀黍身老更收書家  
世遺風在閭閻是事疎只宜沮溺地著我伴耕鋤

二十九日歸寄鄭一

野外青嵩寺城邊禪月臺收功行藥後排悶坐輿來宿  
雨苗當熟新涼桂已開誰知老丘壑自不奈塵埃



浙運寄聲子任子恕

澗水文場好成才  
屬少年龍遊看過鎖漁浦  
發潮船才地當強仕朝廷正選賢  
會逢余與趙為報各揚鞭

寄教器之

絕代教夫子春來定若何  
新豐逆旅市叩角飯牛歌  
漢相延東閣成周在泰和  
彙征調玉燭小用亦金坡

寄仁

原本  
缺

分外僧家好如今更住山  
都無城市鬧只有水雲間  
打

供隨緣後罷叅開淨間紛紛底榮宦何事復相關

趙寺丞之子來代書寄

只有心情在都無言語吟子官忻見面翁節苦為心霜  
雪歲云暮風雷冬已深老身相望處徒益鬢華侵

東周五哥

我欲春山去呼兒取杖藜弄晴方見日吹雨又生泥悵  
望還歸舍懷思未隔溪會當舒此興花草步芳蹊

寄趙十監試

紫此詩二首  
其一見七律

先朝重詞賦人道小賢良善記推才博雕章驗識長宗  
英龍首盛名字鴈行香王舍城中試月華仙桂芳

贈趙十

泉石何關爾多應潔我塵試揩雙泪眼徒惜一吟身選  
甚年年別須當物物親相遭雖澹泊秋得雨方新  
薄夢驚秋曉窮原喜夕陰只知閒迤邐不覺老侵尋鳥  
翼應知倦蟬聲亦和吟酒闌詩更逸巖寺記同臨

贈成季子任

心跡能閒淡何勞數面親沙坑元似故坎石更常新陶  
寫非流俗尋思隔幾塵清溪舟楫句乃復在茲辰

贈勲老

客路何曾好禪林一味清鐘聲回短夢梵唄入幽情綺  
語多生債塵勞宿念輕詩邊懷抱嬾聊復為君傾

贈趙成父

教得兒登第儒科一素風故家欣未艾吾黨不應窮拭  
目行都裏興懷寓里中如君老兄弟好去一尊同

贈子任

每恨沙坑遠十年纔兩過閒人身則爾君子意如何古  
井無驚浪喬林不改柯留連因繾綣躑躅為婆娑

贈曾承務

紹興人物志贛上盛諸曾積厚培應固流長續更興四  
明愁獨散二浙喜相承再緝文盟日吾儕豈面朋

初六日呈仲至兄聞告假欲還婺

已是多疎隔更言當暫歸歲新雲未解風轉雪還飛曉

岸蒼山古春江白浪肥過家無宿留急此醉芳菲

呈坐客

酒在詩情外詩成酒量中氣清吟奧妙神受醉朦朧到  
手千鍾在回身一笑空故家人有幾我輩興無窮

愛客

婆餅焦何急飛鳴小竹間雨多溪漲水雲厚日藏山景  
物固無恙人情終等閒老來惟愛客茶果或相關

山中九年

矣見於詩者如此欣戚亦人之常也集而錄之可警可省

王有道詩刊成謝林教授

七卷靈溪集有誰能為傳既勞親校勘使得與雕鐫從  
昔詩雖在因茲名可全摩挲新叙引羨爾廣文賢

十月十九日頭昏痛忽教授過別

臥病空山裏公來忽語離風行殘葉日霜淨早梅時湖  
上探龍井天邊入鳳池西疇富魚蟹能復寄清詩

次韻胡教授

猶記到階除虛懷不自居從容姑借酒厭飫愜於書物

物徒娛客人人足勝予年來數相過此道定誰如

用處晦韻送蘄州趙教授有懷寺簿王聖

俞丈

得官居上第掌教喜青春數學須相長仁賢必可親舉  
文元不易斯道本常親若理中州話應逢舊德人

和孟五十六韻

沙淨水爭流興籃呼渡幽酒行因繾綣詩到得夷猶盛  
日騰高步飛雲裂袂醉眸江山無盡藏楚尾又吳頭



和昌甫夢中見寄

高人山枕曉何必問鈞天自覺無他夢誰言有此篇交  
遊疑是熟時序亦非便寒食遽遽裏清江憶釣鰯

昌甫題徐仙民詩集因和韻兩篇

斷自晚唐後人人盡做詩生前由我集名後得誰碑眇

眇三靈見蕭蕭一葉知

三靈靈芝靈淵靈舒一葉水心也

塔山林覆土

若莫替芳卮

東南蟠海嶠天也斷閒民歲月高儕侶江湖競比倫楊

劉萬代手溫李再生身雪跨水懸處遊魂不見人

和子仁

古達多從隱巢由復卞隨既拚身似葉何藉命如絲世  
道無庸憾人生有不為深山窮谷裏莫負酒盈卮

周七有詩續至和韻

淨坊成野約樂地可清論士以世何貴佛於人轉尊茫  
茫空遠志歷歷任驚魂連日巖花發佳哉月下門

和履道出會宗伯回訪趙晏叟

山行仍野次零落數家村積雨浮秧把隨風護笋根去  
來應自喜將送與誰論寢飯朝昏處翛然付五言

江山迎世父芒種夏將深家道修遺事人生懷好音衰  
榮元自古雅俗況居今歸興尋幽隱柴門月色侵

昌甫有詩和韻

寒食家家酒誰人不賦詩久陰忻霽日餘潤入花時此  
老非三畧今朝欲四維落紅供醉臥松底著殘棋

昌甫入城席上和韻

金史卷八  
卷八  
因人雖暫賞分韻偶然成不道觥慵舉那知僕屢更老  
成關世道交舊豈時情簷雨林逾靜橋風境過清

二十四日回泊東阜和舊題疇唱十九年矣

海棠枝上日依舊照窻明文會驚猶在重來詠轉清林  
廬記經始花逕已栽成良友仙山去空留百世名

初六日過尹家再和西軒韻贈子文

制宅思前緒軒名到處幽不須論夢蝶只是合盟鷗北  
望劉琨嘯南遊庾信愁百年五字在吾豈為詩謀

家學流風懿成才世自豪出羣能秀發何獨類賢髦紬  
繹遺編富規模古訓高青青秋桂子餘事等毫毛

鄭一病中見寄和韻答之

愛酒阮宣杖僂行陶令輿閒投本無意垂老亦何居萬  
事付杯水一貧唯飯蔬秋懷苦相望幽寺挾殘書

元立復和伯臯送行詩次韻併答之

倒載臨離日搜吟出餞時老身猶藉酒親意不徒詩山  
水東西去園池上下隨凝香兵衛戟應復野人思

半隱平生句年來果謂何  
軻雄墻已及李杜壘終摩  
籍籍須傳遠紛紛何足多  
斯文千古事自笑得如麼

次韻所東因有感答之

籌邊須善策是古肯非今  
名士自江左丈人誰漢陰  
敝廬清晝永幽磴白雲深  
可在唱酬句豈多陶寫心

和卿贈別次韻答之

兩岸春風暖山花水噴泉  
歸期雖較晚行樂肯輸先  
來燕知猶未賓鴻信欲遄  
故人詩送我吟思滿江天

次韻趙理丞

相去如霄壤寒吟只短歌  
春前知歲早臘裏見時和  
待把閒情賦空將老眼摩  
年年願強健江海有披蓑

次韻昌甫九峯留詩

遠峙山常峻幽泉水自泠  
幾回靈井曲如入九峯屏  
雅以平生舊空懷萬古靈  
詩成霜露濕原上草青青

每恨居山淺扶輿過九峯  
幾年無恃怙常此痛音容  
風雨寒垂點雲煙晚復重  
市廛多汨沒忽爾脫塵蹤

每恨居山淺扶輿過九峯溪清通亂石路暗失長松鬚  
鬢時時換身心事事慵雨寒樵牧斷朝暮聽鳴鐘

每恨居山淺扶輿過九峯塵銷草色淡嵐染木陰濃瓢  
飲真堪羨盤飧粗得供一庵飢渴外何事入心胷

次韻吳推官

楚雨黃梅熟卑枝易積陰山園三逕少澗水一溝深蕭  
颯寒猶起低回老亦侵尋詩為君和絕唱有遺音

次韻趙景伯南巖



披藿南巖寺無僧林蕩虛崖懸徒可望泉滴又何居時  
世悠悠轉心情落落疎山行有吟嘯佳處莫躊躇

昌甫自衢送客入城得其詩次韻呈之

霜風散焦暎霧日照寒涼影迹連山白聲華落木黃俗  
情難以澹幽事不關忙我覺年逾邁君吟詩益昌

三見木樨開香傳好客來龐公隱能出杜老句欣陪市  
近心終遠交親語易諧柯山玉溪水人道謂何哉

蓬戶為君開荒園少舊栽猶存小籬落不比一軒苔前

月訪彼矣今朝同此哉人間花草地終古歲寒梅

次韻昌甫見寄

相逢雖數數共話祇匆匆不覺中秋過還當九日中登  
臺嗟往事覓句憶高風人物方彫謝吾儕孰與同

次韻昌甫見詒

屏跡丘園矣秋來事亦忙開林朝斧鈍鑽紙夜燈煌一  
潦屋殊損屢空饑易忘俄而對時菊種種髮能長

次韻昌甫歸後所寄

祇怪深居簡徒希逸駕攀風清玉田路雲白瑞峯山心  
事吟章外情文作帖間相望初若遠一出本非艱

二十日入章泉次韻昌甫所贈

老夢困其獨微吟愜所同閒中徒著句高處盡歸翁一  
代文章志諸方風俗通息交惟士賤尚友則師隆

次韻昌甫別後所寄

居山更入山百事不相關只有猿狙外更無鷄犬間淵  
泉得泂濯巖岫要躋攀最是高人語時容見一斑

徐仁甫建陽一別忽已二十五年見過惘然  
次韻道院池上所作

逃暑身何寄池荷竹院間交朋如玉潔名字飲冰閒吹  
雨餘毫髮鳴泉落珮環長年對村路往日考亭山

次韻成季病中見寄

閒意忽不愜秋聲隔市門千林空白晝一葉下黃昏歸  
馬正修睦捕蝗俄討論願豐穰慮歉相望數家村

次韻仲至

能道意中事詩來看復嗟春風殊作惡春雪固能佳引  
玉下梅萼輸金上柳芽睡翁山水縣隔竹定敲茶

次韻黃崇道

長夏得閒趣無過里社中往來三逕日舒寫一襟風幸  
與陶潛醉從渠阮籍窮人家鶯燕裏猶記淡烟籠

馬莊甫經過畱五字次韻

老却溪山眼荒寒不見人草深多爛舊梅淺易尖新歲  
事誰嗟晚年齡自惜春相逢既相識聊借酒精神

盧教授約周縣丞來訪次周丞韻

今古山陰道誰吟雪下船久將隨俗好便擬作春妍朝  
市無閒日山林有瀑泉薰風吹兩鬢蠶事欲三眠

次韻仲至

臘向殘年去春從元日迴急搔雙鬢髮渾染幾塵埃詩  
話驚頻改杯停喜更催椒盤隨綵勝金柳帶瓊梅

次韻趙將

篴輿來澗谷話久不知還自是無人到誰能有我閒綠

陰晴樹外清馥野花間客去鷄鳴午呼兒又掩關

次韻德久

澄淨清秋夜詩成兩眼明佳人千古意濁酒一杯情湖  
水魚龍舞天風鴻鴈鳴菊花九日近便合上崢嶸

次韻劉名虎

論交貴知己相與可忘年久旱為霖日餘涼畏暑天浮  
沉非識治用舍不因賢只有青山好分明阿那邊

昌甫念某生朝寄詩來次韻謝之

俾壽情何重  
醕吟報恐遲  
拜嘉誠自喜  
友誼尚誰為  
醕我遙相命  
思翁不獨詩  
晚生頭已禿  
敬長眼空窺

次韻昌甫

相知新固樂  
人物易如林  
遊愛郭同許  
衰思范與吟  
放歌能共和  
會約待重斟  
還我晏齋隱  
何嘗枉尺尋

相送思前日  
同吟憶此時  
情親五字句  
意妙一篇詩  
長夏看榴火  
薰風入鬢絲  
西湖渺何許  
終愧北山移

古道定誰成  
莊周與淨名  
勞哉秦外趣  
甚矣潁陽清  
並



舍披衣去行橋拄杖聲遙知園列樹新好看初榮

別後忽逢雪歲寒殊惘然自憐疎酒盞誰識寄詩編老  
矣思離闊遐哉漫屬聯金仙玉田路來往記今年

章泉泉上屋茅補定牽蘿意象時間少心思古處多暑  
風今夏矣涼雨奈秋何顧我顛毛白門閒亦養疴

老嘆交情少閒知友道難何堪武夷曲更近子陵灘絕  
口談龍肉從渠食馬肝敢云棲擇木隨世一枝安

秋風過秋雨眇眇正愁予望斷嗟何寄吟成懶自書齒

搖誠有數鬢禿恐無餘幾載章泉水山深只晏如

次韻景瑜

盡道今年煖冬來十月中更無霜共雪時有雨隨風薄  
宜其如拙浮生乃奈窮衰顏負清鏡猶借酒能紅

同周次公步尋起雲舊基次韻

起雲亭不見立盡水邊人滿眼高情少驚心得句頻龜  
毛真兔角鳳翼漫龍鱗山澤行吟久淵明漉酒巾

次韻見詒

倦作京華夢秋霖失旱乾故人相見後不覺話悲酸酒  
殘還更酌詩盟復肇端如翁真老大莫數鄭都官

次韻蓋友

林外山平遠衰顏落筆難風聲催日晚雲物轉霜寒京  
邑九衢盛江湖千里寬交遊盡詩社名譽得蘇端

次韻潘文

小試登山屐因閒見野僧談禪還靜憩望遠得虛憑分  
韻吟心適歸來醉夢騰酒醒深夜起推枕只寒燈

次韻伯臯

易別難相聚傾懷語未終  
敝廬纔郭外高隱遠鄉中  
天地常年在溪山觸處同  
營營非我事有句欲乘風

次韻斯遠見贈

剝啄君家去同為兩縣來  
趙施元保社徐鄭亦尊壘  
便做壯心已須饒老眼開  
交遊容易別十日重徘徊

次韻希之

山遠飛晴靄春江景有餘  
推窗風浩蕩憑几日徐舒  
何

計用休沐忘懷得燕居從容話千載隨飯只盤蔬

次韻石魯瞻

髣髴徂徠老因詩只遡風胡為猶爾健應恠懶能工此  
道今皆棄高情自不同和成千里夢題寄欲歸鴻

次韻昌甫醵硯

圓澤三生石陳登百尺樓硯因銘共永詩與字俱鏤此  
老非徒耳間人更點頭魏銅那敢擬朱錫盞為侔

次韻叔向

君在南湖住我同東郭遊陳蕃無下榻王粲有登樓吟  
苦詩陶寫酣沉酒拍浮德輝天外鳳機靜水邊鷗

次韻趙清江

煙禁憑誰會杯寒只自斟幾多原上恨猶記少年心領  
畧因初見經行或重臨攀花問楊柳絲竹也清音

次韻上饒

有句間中得應知百慮休麥天連澗冷梅月夾山稠喚  
起陶潛醉能消庾信秋朝端富鸛鷺邊瑣少貌貅

官事人人哀誰憐寂寞鄉卑高多貴賤寒暑易炎涼歎  
息絃歌美殷勤篇翰長閒民為興起交道得其詳

次韻成季

短短長長柳紅紅白白梅溪浮何處棹山對別時盃春  
事還應爾人情有是哉却因嘉樹底渾見好花開  
畎畝秋來雨村村不厭多暑應無熱惱涼可起沉疴花  
動門中桂葉浮池上荷南隴詩到手想像與同哦

次韻周五哥

莫道春猶遠連陰初未曠振衣行復阻岸幘坐成癡芳  
事誠須酒交情豈為詩清明翻手是常記舊相隨

次韻子任

城郭秋風晚人來自遠山荒荒行砢确淺淺渡潺湲虎  
尾休論履龍鱗且願攀過從因煮餅惜取片時閒

小酌餘耿幹連趙推官分韻復和韻

時坐人以葉潤林塘

密為韻分賦皆次其韻案此

詩五首其三首見五言古

潛魚空浪藻倦翼漫風林邂逅留連飲從容取次吟名



言驚思苦離話惜情深昔爾那知此他還未必今  
雨歇收朝潤風迴起夕涼君今過澧浦客有到錢塘落  
澗高槐影浮簷細竹光尋思須浪賦雜伯更談王

二十四日昌甫斯遠子功集雪觀次韻斯遠

閒將詩句和涼自雨中來可是不相聚那能得此回香  
爐連筆格茶椀更山罍一架蒲陰綠殘陽晚又開

示棐槃茶

乃祖文名在羣兒好讀書愁深我將去恨不汝同居風

俗隨時薄人情莫自疎傳家詩禮學勤苦要三餘

亨中之孫求詩

團源古君子老去孰追隨  
隱約孫能奉高深我却知  
家傳無自畫鄉薦有誰為  
成立須勤苦清哉是祖師

東乙翁上人

草樹隨時長城春雨易蒸間  
人來入市官舍却逢僧  
覲面非竿木何心是葛藤  
喫茶看洗鉢忘却老昏瞢

山玉冰溪地常年衲子過  
杖挑明月重笠戴白雲多洞

遠今無驚湖高舊見鶩與君三歎息佛法付天魔

九月四日黃子功林德久自柳州共汎訪鉅師  
閒得琴尊勝尋詩約俊遊欲窮山下寺旋買水邊舟誰  
悟牽黃犬自應盟白鷗野晴秋意思渾付碧雲休

寄乙上人

孟蘭盆會日元自目捷連攝化應無量追修亦有緣荒  
荒誰正令的的漫單傳業報衆生苦三塗對四禪

